

八旗通志初集卷之一百五十七

名臣列傳十七

正紅旗滿洲世職大臣一

何和禮額駙

多濟禮

子薩哈

孫謨達

曾孫巴克山

和碩圖額駙

杜雷

和爾本

葉克舒

子胡葉

道喇

安達立

子阿機賴

瑚錫布

曾孫富長

托克推

碩詹

孫達色

覺善巴圖魯

覺善巴圖魯

何和禮額駙滿洲正紅旗人。姓董鄂氏。其先自瓦爾喀遷於董鄂。因以地爲氏。祖曰克徹巴顏。父曰額爾謹瓦爾喀。世長董鄂部。何和禮額駙幼而凝重。志量寬和。年二十六代其兄屯朱魯巴顏爲部長。聞

太祖高皇帝納妃哈達。身率甲士三十人護從以行。比還。遂以所部軍民來歸。

太祖寵異之。命尙固倫公主。授一等大臣。戊申年。從征烏喇。率本旗兵敗敵有功。辛亥年冬十二月。奉命同額亦都巴圖魯達爾漢轄督兵二千征渥集部之

虎爾哈路圍札庫塔城。三日招之不下。攻拔之。
斬首千餘。俘二千人。其環近諸路盡招撫降之。
何和禮額駙自來歸。特蒙

眷注。列在親臣。

特命與費英東札爾固齊額亦都巴圖魯達爾漢轄碩
翁科洛巴圖魯同爲五大臣。癸丑年春正月。從
太祖再往征烏喇國。布占泰貝勒率兵三萬。越伏爾哈
城而軍。

太祖欲再加申諭。何和禮額駙與費英東札爾固齊五
大臣等。皆力主進戰。遂滅烏喇。天命六年。從大

兵取遼陽。降七十餘城。並在行間。指揮督率有
功事。

太祖三十餘年。推誠宣力。勤勞王室。授世職三等總兵
官。九年。卒於官。年六十四。時費英東。額亦都。碩
翁科。洛巴。圖魯。達爾漢。轄等。俱已先歿。

太祖聞何和禮卒。深加悼惜。慟哭曰。朕股肱諸臣。何其
不遺一人耶。以其子和碩圖。額駙嗣職。

世祖章皇帝順治十二年。追諡溫順。勒石紀功焉。康熙
五十七年。

聖祖仁皇帝謁

陵至盛京。特遣大臣往奠墓次。子六人。多濟禮和碩圖。

杜雷俱有傳。

多濟禮。何和禮額駙長子也。初從

太宗文皇帝征烏喇。及明國。有功。授三等甲喇章京。世職。坐事降爲牛錄章京。未幾任梅勒章京。從大兵征明過北京。以屢次克敵。復授三等甲喇章京。世職。崇德元年。征瓦爾喀部落。獲壯丁三百七十五名。婦女幼小八百三十口。馬牛貂皮等物無算。

太宗特命禮部官迎至五里外。宴之。五年正月。偕翁阿

岱率官兵駐防錦州。二月，偕札喀柱詣寧古塔。偕寧古塔章京往征兀札喇部落。六月，凱旋，獲兀札喇氏一百一十人，復

命於五里外，設宴迎之。七年，坐事罷職。順治五年十月

十七日卒。年六十。子薩哈，以護軍校從征江西，敗賊有功。凱旋時創發，卒於軍。授拖沙喇哈番。子謨達襲。順治十六年，謨達從征貴州，凱旋至江南。值海寇鄭成功陷鎮江，圍江寧，隨大兵奮力擊賊，敗之。以功加至拜他喇布勒哈番。仕至滿洲副都統。子巴克山，初任驍騎校。順治十六

人
功
年亦隨征貴州。凱旋過江寧。同父擊海寇鄭成
功。三敗其衆。以功授拖沙喇哈番。仕至駐防杭
州協領。

和碩圖。何和禮額駙第四子也。初襲父三等總
兵官世職。辦事明敏。兼通漢文。

太祖高皇帝愛之。以代善貝勒女妻焉。封和碩額駙。天
聰元年。任固山額真。隨大貝勒阿敏。濟爾哈朗
克朝鮮。又從大兵征明錦州。寧遠等處。著有勞
績。二年。隨阿巴泰貝勒率師破錦州。杏山。松山
諸處。征察哈爾。敗其四路兵。以功加五備禦之

職進封三等公爵。三年。隨岳託貝勒濟爾哈朗
貝勒征明攻大安口。擊敗馬蘭峪駐防兵。再敗
敵救援兵。二次率本旗兵取遵化。於燕京北土
城關結營。明師來犯。擊敗之。又率本旗兵突出
敗敵於蘆溝橋。又擊敗其四總兵官之兵。取永
平府。率本旗兵擊敗敵衆。四年正月。率本旗兵
駐防灤州。五年。敵兵出大凌河城。圍我所得臺
站。和碩圖擊走之。敵援兵四萬至。再敗之。七年
六月。奏言。向荷天祐。得大凌河。貝勒大臣無不
忻然。以下士卒則皆不樂。今當酌議。先固城堡。

相度明之邊界。乘暇而入。殺其人。取其物。務令士卒各飽所欲。其還師遲速。難以預必。或留或歸。待入邊後方可定也。先議固我城堡者。誠慮入邊之後。若天意祐我。各城致書納款。雖欲速回。勢必不可。其南面四城及蓋州舊寨。此六城可暫停修築。仍宜展地於築城處立界。耕種田畝。平時則令婦子往耕。出征則婦子仍收舊城。止令男子哨探耕種。其停修南面六城者。恐我兵去後。各處敵人知覺。相隔甚遠。難於援救。故六城宜停修築。無論有功無功之人。槩照壯丁

計派輓炭。若易爲力。則將瀋陽牛莊。耀州三城修理。然後我兵入邊。就彼糗糧。秣馬休兵。庶邊之內外。皆可長驅矣。閱數日以病卒。

太宗文皇帝親臨其喪。慟哭之。時年三十八。順治十二年。追諡端恪。立碑墓道。

杜雷。何和禮額駙第五子也。自幼隨征。屢立戰功。崇德元年。仕至固山額真。隨

太宗文皇帝征朝鮮。率阿禮哈超哈兵。登王京城。城上兵不敢拒。各路奔竄。因盡收其財物牲畜。四年七月。

賜珊瑚數珠一串。八月坐事免官。六月大兵征明。圍松山。步越壕塹。突入敵隊。擊敗其衆。八年復起用。爲固山額真。

太宗命和碩禮親王妻以女。授和碩額駙。尋同輔國公篇古博和託。固山額真伊拜。率官兵駐防錦州。順治元年。定鼎燕京。入山海關。擊流寇。追至慶都縣。大破之。以功授牛录章京。世職。三年。隨靖遠大將軍肅親王豪格。征四川。分兵征勦遵義夔州。茂州。榮昌。隆昌。富順。內江。資陽等處。斬僞巡撫道員總兵以下等官一千餘。兵丁無算。獲

馬騾一萬二千四百餘。俱在軍中贊畫有功。加世職爲一等阿思哈尼哈番。未幾又加一拖沙喇哈番。

世祖章皇帝以其係公主所出。加爲三等精奇尼哈番。九年遇兩次

恩詔。加至二等伯。十三年卒。年五十。

和爾本。和碩圖子。天聰八年襲父三等公爵。九年免功臣丁役。別置牛衆時。

太宗文皇帝命和爾本專管四牛衆。崇德元年封其所尙公主爲固倫公主。三年任燾章京。四年隨貝

勒岳託等。征明山。東山西等處城堡。凡敗敵十餘次。生擒其將一人。降其二王。後以病卒於軍。年僅二十。康熙五十四年。追諡端儼。勒石紀功。弟哲爾本襲公爵。

葉克舒。滿洲正紅旗人。姓惠和氏。世居尼馬察地方。

國初隨父泰松阿。率宗族及七村人來歸。授備禦世職。天命六年三月。從大兵征明攻遼東。敵出城嚴陣以待。葉克舒奮勇殺入敗之。授二等叅將世職。

太宗文皇帝卽位。擢兵部承政。考績。加世職爲三等副將。任固山額真。坐事免官。併革世職。尋復任固山額真。天聰八年六月。隨貝勒代善。薩哈廉。率本旗兵。自喀喇俄保地方。入得勝堡。蹂躪大同一帶。取其城堡。西畧黃河。合兵於朔州。九年五月。

太宗命墨爾根代青貝勒多爾袞。由大同入明邊。遣葉克舒隨和碩額爾克楚虎爾貝勒多鐸。入寧遠錦州地界。遙望立營。以牽制明兵。崇德元年五月。隨英武郡王阿濟格。往征明。入延慶州。克十

二城。二年七月。帥師征黑龍江。擊敗博穆博古里。攻取雅克薩城。進至薩哈爾地方。俘獲男子六百四十名。家口一千七百二十名。馬一百五十六匹。牛一百四隻。論功授牛錄章京世職。十二月。從征朝鮮。遇平壤巡撫。安州總兵。札立二營。擊敗之。殺平壤巡撫。及其兵二千餘。獲馬千餘匹。又遇一巡撫。二總兵。率副使等官十員。兵二萬。從安邊來。欲襲我後。因設伏誘殺副使五員。兵萬人。獲馬千匹。餘衆俱遁入山。葉克舒率兵圍之。三日而降。至哈忙城。巡撫總兵官副使。

及各邊副使等。共十五員。各率本城軍民不戰而降。所過城郭獻納之物。葉克舒隨分給蒙古十六固山將士。三年五月。任兵部右叅政。四年十一月。同曹海等率官兵往征索倫部落。五年三月凱還。

賜貂皮四十七張。人三口。加授半個前程。是年同固山額真圖爾格往畧明邊。設伏錦州西南烏忻河口。捉生比還。敵人引兵千餘潛襲我後。葉克舒收兵還擊。往來衝突。力戰敗之。斬百餘人。獲馬十三匹。以功加世職至二等甲喇章京。坐事免。